



AB-atuisunut aqqissuussamut, Danmarkimi atuuttumut assingusumik Naalackersuisut aallartitsinissaannik peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaqa Jens-Frederik Nielsen, Demokraatit)

(Siullermeerneqarnera)

Siullermik Demokraatit Inatsisartunut ilaasortaataannut qujarusuppunga isummerfigisassatut siunnersuummik uuminnga pissanganartumik saqqummiussineranut - tunngaviatigut - sanatitsisut, tassani atuisoq, sanasut isumaqatigiissusiorneranni toqqissisimanerunissaannik, siunertaqartumik.

Demokraatinut nalitoorujussuuvoq, amerlasuutigut ammasumik ersarinnerusumillu assigiinngitsutigut ingerlatsineq, innuttaasut sullinneqarneranni. Piffissami, sanaartorerit siuariartuleruttorfianni, siusinnerusumullu sanilliullugu illunik piginnittunik amerlanernik takusalerfitsinni, pissusissamisoorpoq aqqissuussat tamanut atuuttut ilaannut isummernissarput sanatitsisumut sanaartortumullu pitsaassutsimik isumannaassutsimillu qulakkeerinninnissamut.

Tamanna paasineqarsinnaavoq ilimasuuteqarnerup ataqatigiissumik ajornaallisakkamillu tulluussaanertut. Demokraatinut pingaarnerunngilaq, atuisunut aqqissuussap aqqa. Naalackersuisut; AP atuisoq-tut imaluunniit AB-atuisunut aqqissuussamulluunniit taasaraluarpagu. Pingaarnerpaaq imaaginnarpoq, ersarissumik atoruminartumillu najoqqutassiaqarnissaa, illuatungeriit aserfallatsaaliinermi-nutarsaanermilu namminneq pigisaminnik angerlarsimaffinnik imaluunniit, nutaarluinnarmik sanaartornermi isumaqatigiissusiornermut atatillugu assigiissumik illuatungeriinnullu qularnaarisussamik.

Sullinneqartut, tassanilu sanatitsisut, qulakkeerneqartariaqarpoq toqqissisimasumik ersarissumillu, suliarineqartut isumaqatigiissutit taakkulu pisussaaffiliinerisa malinneqarnissaat. Qulakkeerinninnermullu ilaavoq, sanaartortup suut isumaqatigiissutaasimanersut sananeqartussallu qulakkeersimanissaat. Tassa allatut oqaatigalugu tamanut iluanaarutaasumik.

Isumaqarpugut tamanna ullutsinni pingaaruteqartorujussuusoq, pingaartumik illoqarfinni annerni sanaartortitsisartunik amerlanerusunik annerusunillu peqarmat namminersortunillu, amerliartortunik, taamaalilluni sanatitsisumut ajornakusoorsinnaalluni suliap pitsaassusaata nalilersornissaa.

Ullutsinnut pisumut assersuusiulaarlanga tassa aviisi, Sermitsiaq 23. april 2022 ulluinnarni inuussutissat akiisa qaffakkaluttuinnarnerinut atatillugu atuisut unammilligassaqalernerat takutimmaq.

Ilinniartitsisut peqatigiiffiata siulittaasuata tassunga atasumik ujartorjaa, atuisut siunnersuisoqatigiiviniq pilersitsisoqartariaqartoq:



"... tassani iliuuseqarfigineqarsinnaallutik akigitinneqartut niuernermilu atugassarititaasut naapertuutinngitsut, siunnersuisoqatigiimmi atuisut politikikkut isumaat inuussutissarsiortunut Inatsisartunullu erseqqissartassammatigik".

Taanna assersuut assersuutaannaavoq atuisut soqutigisaqartullu sinnerisa unammilleqatigiinnerup annertusigaluttuinnarnerani illersorneqarnissaannik pisariaqartitsinermik takutitsisoq. Taamaammat pissutissaqarluarpoq AB-atuisunut aaqqissuussamut aallartinnissaanut siunnersuutip ingerlateqqinnissaa. Kikkut tamarmik sanaartormik tunuliaqutaqanngillat nalilersuinissamut, ilumut sanaartortup isumaqatigiissutaasimasutut suliani naammassisinnaaneeraa illuatungeriit tamarmik naammagisaannik.

Taamaattumik aamma iluarisimaarparput, Naalakkersuisut aaqqissuussap marlunngorlugu avinnissaanut pitsaaqutinik tikkuussinerat, tassani sanatitsisunut aaqqissuussamik pilersitsisoqarsinnaalluni, ilinniarsimannngitsunut ilinniarsimasunullu, tassani AP 95 pioreersoq pigiinnarneqarsinnaalluni.

Siunnersuutip aamma pitsaaqutigivaa, aaqqissuussap pinngitsaalisamik atorineqannginnissaa, namminerli aalajangerneqarsinnaalluni taamatullu illuatungeriinnut periarfissatsialaalluni.

Taamatut oqaaseqarluta siunnersuut ataatsimiititaliami attuumassuteqartumi suliareqqinneqarnissaa innersuussutigaarput, tassani aamma aningaasatigut sinaakkutit aalajangerneqarsimasut allanngortinneqassanersut isiginiarneqartariaqarmata, tassami Naalakkersuisut aaqqissuussap pioreersup AP 95-ip atuutiinnarneqarnissaanut periarfissiimmata, taassumalu qaavatigut ilinniarsimannngitsunut atuisunut aaqqissuussaq AP-atuisoq naaperiaassutigalugu.